

**BELLUNENSIS - FELTRENSIS**

**Beatificationis et Canonizationis Ven. Servi Dei Ioannis Pauli I (Albini Luciani)  
Summi Pontificis (1912-1978)**

**DECRETUM SUPER MIRACULO**

Venerabilis Servus Dei Ioannes Paulus I (Albinus Luciani) a die 26 mensis Augusti anno 1978 Summus Pontifex fuit, usque ad diem 28 mensis Septembris eiusdem anni, cum in Apostolica Aede necopinata morte periret. Natus die 17 mensis Octobris anno 1912 in vico Furni Canalis, hodie Canale Agordino, Bellunensi in dioecesi, brevi tempore se ad sacerdotium vocatum cognovit. Ordinationem presbyteralem die 7 mensis Iulii anno 1935 suscepit in ecclesia Sancti Petri Apostoli Belluni ac sacerdotale ministerium in paroeciis inchoavit. Episcopus Bellunensis-Feltrensis eum in Seminario dioecetano rectoris vicarium ac magistrum constituit. Albinus Luciani in theologia doctoris gradum etiam adeptus est apud Pontificiam Universitatem Lateranensem. Bellunensem intra dioecesim plurima pastoralia officia gessit et laboris auxilio, in regimine illius Ecclesiae particularis agendo, suos Episcopos adiuvit. Dein Victoriensis Venetorum electus est Episcopus ac die 27 mensis Decembris anno 1958 a sancto Summo Pontifice Ioanne XXIII in Basilica Vaticana consecratus. Omnibus Concilii Oecumenici Vaticani II sessionibus interfuit. Vergente anno 1969 sanctus Summus Pontifex Paulus VI eum Venetiarum Patriarcham designavit, necnon die 5 mensis Martii 1973 Sanctae Romanae Ecclesiae creavit Cardinalem. Magni momenti muneribus functus est intra Coetum Episcoporum Italiae et Synodi Episcoporum partem habuit anno 1971 et anno 1977. Venetiis in primis operam dedit, ut Concilii praecepta apte reciperentur. Successor Petri electus, Ioannis Pauli I nomen sumpsit, duorum proximorum Decessorum eius nomina commiscens. Tres et triginta Pontificatus sui diebus humilem vivendi modum ostendit ac eximiam Evangelicam sobrietatem. Cum obiisset, eius sanctitatis fama testimonia per orbem terrarum usque increbruerunt. Die 8 mensis Novembris anno 2017 Summus Pontifex Franciscus Venerabilis Servi Dei heroicas virtutes agnovit.

Beatificationis respectu, Causae Postulatio miram aestimatam cuiusdam puellae sanationem huius Congregationis de Causis Sanctorum iudicio su-

biecit. Res accidit in Argentina anno 2011, cum puella duodecimum ageret annum.

Die 27 mensis Martii in valetudinarium Paranae recepta est, capitis dolore, feбри, nausea et vomitione, necnon movendi loquendique defectibus confecta. Ei igitur gravis comperta est encephalica nervorum systematis infirmitas. Duobus mensibus transactis, clinicae condiciones in melius minime mutaverunt et antispastica medicamenta se nihil valere demonstraverunt. Inde die 26 mensis Maii aegrota Bonaëropolim translata est, in vehementioris curae valetudinarii partem. Insequenti autem mense gravis status septicus accessit, quadam arteriarum pulmonisque inflammatione effectus. Medici igitur quoad vitam et quoad valetudinem infaustam ediderunt prognosim, de qua et parentes certiores fecerunt. Puellae mater, propter eius impendentis mortis nuntium fracto afflictoque animo, ecclesiae parochum Dominae Nostrae v.d. *de la Rábida* advocavit. Qui aegrotam visitavit eiusque sanationem per intercessionem Venerabilis Servi Dei invocare censuit. Nam ab infantia singularem devotionem in Ioannem Paulum I coluit. Ideo mater et sacerdos univocam invocationem una voce adhibuerunt, simplice sinceraque fide sustenta. Postridie, videlicet die 23 mensis Iulii anno 2011, puellae condiciones visae sunt praeter expectationem mutavisse, diffusum statum septicum convalescere atque cursum sanguinis respirationemque de novo constare. Nec mense sequenti permanentem statum epilepticum quoque inveniebatur, adeo ut die 5 mensis Septembris puella domum rediret. Itaque evidens est concursus temporis et consequentia inter Venerabilis Servi Dei invocationem et aegrotae sanationem, quae dein consequentibus annis inspectionibus medicorum frequenter supposita est, ad eius integram comprobendam valetudinem. Intellectus motusque facultatibus praestanter inde recuperatis, naturali socialique vita pollens, sana deinceps vixit.

De hac sanatione, apud Curiam ecclesiasticam Bonaërensem Inquisitio dioecesana a die 22 mensis Februarii anno 2016 ad diem 30 mensis Novembris anno 2017 celebrata est, cuius decretum de iuridica validitate editum est ab hac Congregatione de Causis Sanctorum die 27 mensis Aprilis anno 2018. Coetus Medicorum, in sessione diei 31 mensis Octobris anno 2019, declaravit sanationem celerem, perfectam, constantem necnon ex scientiae legibus inexplicabilem fuisse. Consultores Theologi die 6 mensis Maii anno 2021, necnon Patres Cardinales et Episcopi die 5 mensis Octobris eiusdem

anni, Ordinaria in Sessione congregati, posito dubio an de miraculo divinitus patrato constaret, affirmative responderunt.

Facta demum de hisce omnibus rebus Summo Pontifici Francisco per subscriptum Cardinalem Praefectum accurata relatione, Sanctitas Sua, vota Congregationis de Causis Sanctorum excipiens rataque habens, hodierno die declaravit: *Constare de miraculo divinitus patrato per intercessionem Venerabilis Servi Dei Ioannis Pauli I (Albini Luciani), Summi Pontificis, videlicet de celeri, perfecta ac constanti sanatione cuiusdam puellae a “grave encefalopatia inflammatoria acuta, stato di male epilettico refrattario maligno, shock settico”.*

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 13 mensis Octobris a. D. 2021.

MARCELLUS Card. SEMERARO  
*Praefectus*

L. ✠ S.

✠ FABIVS FABENE  
Archiep. tit. Faliscodunensis, *a Secretis*